



En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
 Webwerf: <http://www.nuwelied.info>

In Die Voetspore Van Die Gemeente Van Handeling

Hierdie artikel skryf ek na selfondersoek wat die gevolg was van 'n besef dat ek vanuit die misleiding van die Christendom gekom het, maar toe vasgevang geraak het in die misleiding van die Messiaanse Beweging (Messiaanse Ontwaking; *Hebrew Roots Movement*). Ek besef dat ek my blootstel aan verdere kritiek soos wat sommige van my ander artikels reeds tot gevolg gehad het. Maar ek neem nie deel aan 'n gewildsheidkompetisie nie!!

My doel met hierdie artikel is nie 'n aanval op die Messiaanse Beweging nie, maar eerder 'n waarskuwing teen elemente van misleiding in hierdie beweging, asook 'n oproep om terug te keer na volgelinge van Yeshua soos dit in die Skrifte van die Nuwe Verbond vir ons opgeteken is.

Die gevolgtrekking waartoe ek gekom het, is dat die Messiaanse Beweging misluk het, of besig is om te misluk, en in hierdie artikel sal ek die redes vir my standpunt verduidelik. Nou voordat ek 'gekrusig' gaan word oor hierdie gewaagde stelling, wil ek net daarop wys dat ek nie die enigste een is wat hierdie siening het nie. Ja, daar is ander wat dieselfde standpunt het!!

Daarom is dit die moeite werd om na die volgende kort video, 'Why The Hebrew Roots Movement Will Fail', te kyk: <https://www.youtube.com/watch?v=ewasWMds4E>

Woelinge, Verwarring En Verdeeldheid

Huidiglik is daar baie woelinge, verwarring en verdeeldheid in die Messiaanse Beweging. Daar is dus nie sprake van eenheid nie en gevolglik is daar, soos in die Christendom, baie 'denominasies' of groeperinge! Die meerderheid van hierdie groepe het 'n 'Joodse karakter' aangeneem en hulle eie identiteit tot 'n groot mate verloor. So ook is die strewe na eenheid met die huis van Juda so groot dat talle – individue en groepe – bereid is om hulle vertroue in Yeshua 'te verswyg' en eerder net te konsentreer op die gemene deler van beide huise, naamlik liefde vir Torah! Maar onthou hierdie woorde van Yeshua:

Elkeen dan wat My sal erken voor die mense, hom sal Ek ook erken voor My Vader wat in die hemel is, maar elkeen wat My ontken voor die mense, hom sal Ek ook ontken voor My Vader wat in die hemel is. Matt. 10:32 en 33¹.

¹ Alle teksverwysings is geneem uit PWL (Pad van Waarheid tot die Lewe) vertaling, behalwe waar anders vermeld. Die PWL kan gratis afgelaai word by www.padwlewe.ch, maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com.

En in hierdie proses het baie hulle liefde vir die Skrifte van die Nuwe Verbond verloor, ja, selfs tot die mate wat dit, of sommige dele daarvan, bevraagteken en selfs verwerp word!! Maar veel erger is die feit dat daar diegene is wat se siening van Yeshua en Sy rol en bediening nou meer ooreenstem met die van Rabbynse Judaïsme as wat die Skrifte van die Nuwe Verbond ons leer! In die verband is dit nodig om herinner te word aan Paulus se woorde in 2 Kor. 11:1 tot 4.

Ek wens julle wil my net 'n kort rukkie verdra terwyl ek in dwaasheid praat! Verdra my tog maar, want ek is jaloers oor julle met God se jaloesie, want ek het julle afgegee om te trou met Een Man; om julle as 'n rein maagd aan Die Gesalfde Een voor te stel, maar ek is bang dat, net soos die slang vir Havah deur sy listigheid mislei het, julle denke net so korrup gemaak is, weg van die eenvoudigheid wat by Die Gesalfde Een is, want as iemand kom en 'n ander Yeshua verkondig as wat ons verkondig het, of as julle 'n ander gees ontvang as wat julle ontvang het, of 'n ander goeie boodskap as wat julle ontvang het, kan julle maklik oortuig word,

Nog veel erger is die feit dat daar bedieninge in die Messiaanse Beweging is wat aan bogenoemde skuldig is, maar byvoorbeeld nie bereid is nie om openlik te verklaar dat hulle dele van die Skrifte van die Nuwe Verbond betwyfel of dat hulle siening van Yeshua as Messias meer ooreenstem met die van Rabbynse Judaïsme as met Yeshua van die Nuwe Verbond.

Verskeie bedieninge is so besig om hulle volgelinge (lesers) van die noodsaaklikheid van Torah-gehoorsaamheid te vertel dat hulle opgehou het om die noodsaaklikheid van Yeshua Messias in elkeen se lewe te verkondig! Op dié wyse word die belangrikste opdrag van Yeshua aan Sy volgelinge geminag, naamlik om die Evangelie van redding aan die ganse wêreld (en dit sluit Rabbynse Judaïsme in) te verkondig (Mark. 16:15). Ja, gaan leer by Rabbynse Judaïsme, maar as jy nie bereid is openlik Yeshua as die gekruisgide en opegestane Messias ook aan jou Rabbynse leermeester te verkondig nie, verontagsaam jy die opdrag van die een wat in jou plek die prys vir oortreding van YHVH se Torah betaal het!!

Maar in die verband is daar ook diegene in die Messiaanse Beweging, en in die Christendom, wat glo dat Torah-gehoorsame Jode wel gered is. Diegene met hierdie siening lewer egter bewys dat hulle nie die Skrifte van die Nuwe Verbond glo nie, veral nie Yeshua se eie woorde in Joh. 14:6 toe Hy gesê het:

*Ek is, was, sal wees Wie Ek is, was, sal wees, die Pad, die Waarheid en die Lewe; **niemand gaan na My Vader toe nie, behalwe deur My.***

Daarom het Yeshua dit noodsaaklik geag om vir Nikodémus, 'n Fariseër, te sê: “Dit is 'n tydlose waarheid wat Ek vir jou sê: as iemand nie van bo af gebore word nie, is dit onmoontlik vir hom om die Koninkryk van God te sien.” (Joh. 3:3). Ja Geliefdes, die Torah-gehoorsame ‘Jood’ moet ook, soos jy en ek, wedergebore word deur vertrouwe in Yeshua as die gekruisgide en opgestane Messias – die Lam van God tot vergifnis van die oortredinge van YHVH se Torah!

“Geloofsverklaring”

In die lig van die woelinge, verwarring en verdeeldheid in die Messiaanse Beweging, asook die misleiding wat daarmee gepaard gaan, wil ek dit daarom duidelik stel dat Nuwe Lied

Bediening nie onder die vaandel van die Messiaanse Beweging (Messiaanse Ontwaking; *Hebrew Roots Movement*, ensovoorts) gaan nie. Daarom is ons ‘geloofsverklaring’ kortliks die volgende:

Ons beskou onself as volgelinge van Die Weg (Hand. 9:2; Hand.19:9 en 23; Hand. 24:14 en 22). Hierdie volgelinge van Yeshua is ook Nasaréners genoem (Hand. 24:5). Ons strewende is om in die voetspore van die gemeente van Handelingte te stap deur vertrouwe in Yeshua as die Messias en in gehoorsaamheid aan Vader-God volgens die Torah (die wet) soos in Yeshua vervul is. Yeshua is ons Hoofpriester volgens die orde van Melgisédek en ons as gelowiges in Yeshua dien as priesters in Sy Koninkryk (1 Pet. 2:9). Ons glo dat die Skrifte van die Nuwe Verbond, net soos dié van die Ou Verbond, die werk van die Afgesonderde Gees is!

My Vraag!

Ek vra vandag aan elkeen die vraag wat ek myself dikwels vra, naamlik: Wat moet ons almal wat uit die misleiding van die Christendom kom se ‘missieverklaring’ wees? My antwoord behels die volgende: Ons moet studentevolgelinge (dissipels en priesters) van Yeshua ons Meester wees wat in die voetspore van die gemeente van Handelingte en die Apostels stap!

Maar die Messiaanse Beweging se visie (doelwit) het egter weg beweeg van dit wat die Skrifte van die Nuwe Verbond ons leer en van dit wat deur die gemeente van Handelingte begin was en deur die Apostels verkondig was! Die terugkeer na ons Hebreuse wortels het die meerderheid so verblind dat hulle die verkondiging en uitleef van die Blye Boodskap van Yeshua as die enigste versoening met YHWH as minder belangrik beskou. Die meerderheid het studentevolgelinge van Rabbynse Judaïsme en die Torah van Moses geword en sodoende hulle roeping as dissipels van Yeshua vergeet, of is dit eerder ‘n geval van verloën?!

Waar is die balans tussen dit wat ons in die Christendom agtergelaat het en dit wat die huis van Juda vaskleef. Hoekom is daar weinig bedieninge wat die organisasie struktuur van die gemeente van YHWH soos dit in die Nuwe Verbond vir ons gegee word verkondig en implementeer? Hoe dikwels hoor jy en ek uit die geleedere van die Messiaanse Beweging leringe oor die gawes van die Afgesonderde Gees en die vyfvoud bediening van afgevaardigdes, profete, evangeliste, herders en leraars?

Hoekom het die fokus van hierdie kernwaarhede van die Nuwe Verbond feitlik in die niet verdwyn? Ons moet dit wat die Christendom ons geleer het nie totaal verwerp inruil vir Rabbynse Judaïsme nie! Nee, dit kan ons beslis nie bekostig nie, want dan het ons slegs die misleiding van die Christendom verruil vir die misleiding van Rabbynse Judaïsme.

Daarom glo ek dat die oproep in Open. 18:4 en 5 nie net op die Christendom van toepassing is nie, maar ook op diegene wat vasgevang is in die Messiaanse Beweging en Rabbynse Judaïsme, naamlik: *Gaan uit haar uit my volk.....!!*

Ek het 'n ander stem uit die hemel hoor sê: “Gaan uit haar uit, My volk sodat julle nie deel kry aan haar sondes en nie van haar plaë ontvang nie, want die sondes in haar het opgestapel tot by die hemel en God het haar boosheid in herinnering geroep.

En dan ook die volgende vraag: Wanneer laas het jy met erns die Skrifte van die Nuwe Verbond, veral die Handelingte van die Afgesonderde Apostels, bestudeer? Wie in die

hedendaagse Messiaanse Beweging het 'n soortgelyke getuienis as die van Petrus of Stefanus of Paulus of Johannes? Ek weet nie van een nie!! Daarom sê ek dikwels vir myself: Ons misluk om ware volgelinge van Yeshua te wees, want ons is nog nie op die punt wat ondermeer in Hand. 2:42 tot 44 beskryf word nie:

Hulle het aangehou in die leer van die afgevaardigdes en is deelgenote gemaak in gebed en in die breking van die brood, as Liggaam. Vrees en respek het op elkeen gekom en baie tekens en wonderwerke het deur die hand van die afgevaardigdes gebeur in Yerushalayim. Almal wat vertrou het, was soos een en het alles gemeenskaplik besit en die wat besittings gehad het, het dit verkoop en onder almal verdeel, volgens wat nodig was.

Leonard Ravenhill het die lewe van Stefanus soos volg beskryf:

Everyone recognizes that Stephen was Spirit-filled when he was performing wonders. Yet, he was just as Spirit-filled when he was being stoned to death.

Stefanus het YHVH Yeshua meer lief gehad as Sy eie lewe! Kan jy en ek dieselfde sê? Of het liefde vir die Torah die plek van Yeshua ingeneem? Het itellektuele kennis van Torah ons god geword? Ons kan onself slegs as ware en suksesvolle Gees-ge vulde volgelinge van Yeshua beskou wanneer ons 'n getuienis soortgelyk soos Petrus het toe die kreupel-gebore man genees was:

Shim'on sê vir hom: "Silwer en goud het ek nie, maar wat ek het, dit gee ek vir jou: in die Outoriteit en Karakter van Yeshua, Die Gesalfde Een, van Natzeret, staan op en loop!" Hy het sy regterhand gevat en hom opgetrek en onmiddellik is sy bene en voete genees. Hy het opgespring, gestaan, rondgeloop en saam met hulle in die tempel ingegaan terwyl hy rondloop, spring en God prys.

Geliefdes, Rabbynse Judaïsme gaan nie van ons sulke volgelinge van Yeshua maak nie! Die Torah van Moses gaan nie van ons volgelinge van Yeshua maak waar vrees en respek oor elkeen kom met wie ons in aanraking kom en waar tekens en wonders deur ons gaan plaasvind nie! Nee, hierdie is slegs moontlik vir deelgenote van die Nuwe Verbond waar elkeen die Torah van Yeshua met die hulp van die kragtige werking van die Afgesonderde Gees volg en toepas!

Daarom moet ons 'n onderskeid maak tussen die Torah van Moses en die Torah van Yeshua – wat ons ook die Torah van die Melgisédokorde kan noem. Hierdie onderskeid word deur talle bevraagteken, veroordeel en verwerp, veral deur diegene wat sommige van die Skrifte van die nuwe verbond bevraagteken, veral die brief aan die Hebreërs. Enige gesprekvoering met diegene wat hierdie sienswyse het, is egter nutteloos, want hulle is verblind deur Rabbynse Judaïsme.

Maar diegene wat glo dat die Skrifte van die nuwe verbond, net soos dié van die ou verbond, deur YHVH se Gees geïnspireer is, sal besef dat daar 'n verskil is in die Torah van Moses en die Torah van Yeshua. Dit is veral die brief aan die Hebreërs wat die verandering in die priesterorde, offerandes en dienswerk duidelik uitspel. Die priesterorde van die Nuwe Verbond is volgens die orde van Melgisédok, want die Levitiese priesterorde en gepaardgaande offerandes het met die folterdood en opstanding van Yeshua tot 'n einde gekom!

Ek het al voorheen hieroor geskryf en dit verduidelik, maar wil elkeen weer aanmoedig om die brief aan die Hebreërs, veral hoofstukke 7 tot 10 noukeurig te bestudeer. Dit is ook die moeite werd om te luister na die reeks leringe van Matthew Nolan van ‘Torah To The Tribes’ oor die brief aan die Hebreërs wat afgelaai kan word by [Teachings – Torah to the Tribes](#).

Maar ek wil elkeen ook daaraan herinner dat Yeshua self ‘veranderinge’ aan Moses se Torah gemaak het, soos byvoorbeeld ten opsigte van wat as egbreek beskou word, naamlik dit is nou nie net die fisiese daad nie, maar egbreek is ook as jy net na ‘n vrou kyk en haar begeer (Matt. 5:28)! So het Yeshua ook ‘n ‘uitgebreide’ definisie van naasteliefde vir ons gegee (Matt. 5:43 tot 47). Onthou dat YHVH is die alleen Wetgewer en Hy kan veranderinge aan Sy Torah en volgens Sy Raadsplan aanbring!

Soos voorheen genoem, word ons gekritiseer omrede ons onderskeid maak tussen die Torah van Moses en die Torah van Yeshua. En tog sien ons dat Paulus wel hierdie hierdie onderskeid in 1 Kor. 9:21 maak:

*Vir die wat nie **die geskrewe wet** het nie, soos een wat nie **die geskrewe wet** het nie terwyl ek nie vir **God sonder die wet is nie**, maar in **die wet van Die Gesalfde Een** sodat ek ook die wat sonder **die geskrewe wet** is, kan wen.*

Ons kan dit ook soos volg skryf:

*Vir die wat nie Torah het nie, soos een wat nie Torah het nie terwyl ek nie sonder die Torah van God is nie, **maar in die Torah van Die Gesalfde Een** sodat ek ook die wat sonder die Torah is, kan wen.*

Hiervolgens is dit duidelik dat Paulus hom onderwerp het aan die Torah van Yeshua, Die Gesalfde Een! Hierdie beginsel het hy toegepas en uitgeleef in die teenwoordigheid van die wat die Torah van Moses onderhou het, asook in die teenwoordigheid van die wat nie die Torah van Moses onderhou het nie!

YHVH se Torah

Die Torah van YHVH het reeds in die tuin van Eden bestaan en was van toepassing tot en met Israel se aankoms by Sinai en die sluit van die bloed verbond bekend as die boek van die verbond (Ex. 19:4 tot Ex. 24:11). Maar weens die aanbidding van die goue kalf is hierdie verbond verbreek en het YHVH vir Israel die Torah van Moses gegee om as tugmeester (gids) te dien tot Yeshua sou kom. Sedert Yeshua se folterdood en opstanding is ons nie meer onder die Torah van Moses nie, maar wel onder die Torah van Yeshua.

Ons leef in die dispensasie waar daar net een Torah vir almal is, naamlik die Torah van YHVH soos dit in Yeshua vervul is (Matt. 5:17). Daar is egter nie weggedoen met die Torah van Moses nie, hoewel Paulus in 2 Kor. 3:5 tot 18 verduidelik dat die heerlijkheid van die Torah van Moses nou oortref word deur die heerlijkheid van die Torah van Yeshua. (Verwys [GB2.Feb13MosesSluier](#)). Die Torah van Moses is steeds die basis waar sekere kernwaarhede aan ons verduidelik word, maar die fokus het van die fisiese na die geestelike toepassing daarvan verskuif. Die fokus het van die Torah van Moses na die Torah van Yeshua verskuif en die Afgesonderde Gees leer ons wat ons steeds fisies moet doen en watter fisiese doen van die ou verbond uitgedien is!

Ons gids is nie meer die Torah van Moses nie, maar die Afgesonderde Gees wat ons leer en herinner aan die Torah van Yeshua! Onthou die volgende: Dit is 'n binding wat tot die geestelike dood toe kan lei as ons sou verkies om die Torah van Moses fisies te doen, terwyl ons **nie** verstaan wat dit vir ons geestelik uitspel nie en hoe om dit dan in ons daaglikse geloofslewe toe te pas.

Ons is dienaars in 'n Hemelse Koninkryk wat deur Yeshua self fisies gevestig, voltooi en regeer sal word! Rabbynse Judaïsme het weinig begrip hiervan en daarom is hulle fokus steeds op 'n fisiese Beloofde Land/Koninkryk, 'n fisiese Israel, 'n fisiese Torah van Moses, 'n fisiese tempel' 'n fisiese verlossing van hulle vyande en 'n fisiese uittog na die hedendaagse land van Israel. Dit is nie wat die Nuwe Verbond in Yeshua ons leer nie! Ons stryd en oorwinning is eerstens in die geestelike realm wat ons dan in die fisiese realm toepas en uitleef.

Paulus skryf in sy brief aan die Korinthiërs dat ons die gedagtes van Die Gesalfde een het en daarom kan ons die geestelike dinge met die geestelike vergelyk en ook dat die natuurlike mens nie die dinge van God aanneem nie, want dit is vir hom dwaasheid, want hy kan dit nie verstaan nie, omdat dit geestelik beoordeel word (1 Kor. 2:14 tot 16). Onthou: Rabbynse Judaïsme het nie die gedagtes van Yeshua, Die Gesalfde Een, nie, en daarom verstaan hulle nie die geestelike realm van die Koninkryk van die Hemele nie!! Hulle fokus is steeds op die fisiese!!

Dit is ook baie belangrik om te weet, en te onthou, dat elkeen ('Jood' en vreemdeling / nie-Jood) wat bely dat Yeshua die gekruisigde en opgestane Messias is, is Israel – YHVH se volk. Uiteraard is hierdie nie deel van die leerstelling van Rabbynse Judaïsme nie en daarom stel hulle slegs belang in die eenwording van die twee huise onder Rabbynse gesag sonder Yeshua. Daarom is hulle fokus op dit wat hulle beskou as die fisiese Israel.

Die waarheid oor wie hedendaagse Israel is, is egter baie belangrik om te kan onderskei of die gebeure in die land Israel die werk van YHVH is en of dit deel is van die misleiding wat die koms van die Antimessias vooraf sal gaan!

Ons leef in die laaste dae en ons word gewaarsku dat ons nie mislei moet word nie. Ons moet nie toelaat dat 'n mens ons volgens sy eie kennis leer nie, maar ons moet vra dat die Afgesonderde Gees ons moet leer en lei om YHVH in Gees en waarheid te dien volgens die Torah van Yeshua soos dit vir ons in die Skrifte van Nuwe Verbond uiteengesit word.

Ons moet strewende om in die voetspore van die gemeente van Handeling en die Apostels te stap as 'n koninklike priesterdom onder die Karakter en Outoriteit van ons Melgisédék Hoofpriester. Yeshua, die Lewende Torah van die Nuwe Verbond, is die hart van die Vader! Glo jy dit en is jy bereid om hierdie pad te stap?

En indien jy die hart van YHVH Yeshua het, sal jy ook soos Paulus ten opsigte van sy volksgenote, naamlik die huis van Juda, sê:

My broers, die begeerte van my verstand, wil en emosie en my intrede voor God vir hulle, is vir hulle onthalwe dat hulle gered mag word, want ek getuig van hulle dat hulle 'n ywer vir God in hulle het, maar nie in kennis nie omdat hulle die onpartydige opregtheid van God nie ken nie, maar hulle eie onpartydige opregtheid probeer oprig; daarom het hulle die

onpartydige opregtheid van God nie gehoorsaam nie, want die einddoel van die geskrewe wet is Die Gesalfde Een tot onpartydige opregtheid aan elkeen wat vertrou. Rom. 10:1 tot 4.

Indien hierdie werklik jou hartsbegeerte is, sal jy die Jode en die Rabbyne Rabbies van Yeshua vertel – die enigste weg tot versoening met YHVH-God.

-0-0-0-0-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shalomgroete.
Johan.

E-pos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.